

## “শ্রীশ্রী কৃষ্ণের অষ্টোত্তর শতনাম”

জয় জয় গোবিন্দ গোপাল গদাধর ।

কৃষ্ণচন্দ্র কর কৃপা করুণা সাগর ॥

জয় জয় গোবিন্দ গোপাল বনমালী ।

শ্রী রাধার প্রাণধন মুকুন্দ মুরারি ॥

হরিনাম বিনে রে গোবিন্দনাম বিনে ।

বিফলে মনুষ্যজন্ম যায় দিনে দিনে ॥

দিন গেল মিছে কাজে রাত্রি গেল নিদ্রে ।

না ভজিনু রাধাকৃষ্ণ চরণারবিন্দে ॥

কৃষ্ণ ভজিবার তরে সংসারে আইনু ।

মিছা মায়ায় বদ্ধ হ'য়ে বৃক্ষসম হৈনু ॥

ফলরূপে পুত্র কন্যা ডাল ভাজি পড়ে ।

কালরূপে সংসারেতে পক্ষী বাসা করে ॥

যখন কৃষ্ণ জন্ম নিল দেবকী উদরে ।

মথুরাতে দেবগণ পুষ্পবৃষ্টি করে ॥

বসুদেব রাখি অহিল নন্দের মন্দিরে ।

নন্দের আলয়ে কৃষ্ণ দিনে দিনে বাড়ে ॥

শ্রীনন্দ রাখিল নাম ‘নন্দের নন্দন ।’

যশোদা রাখিল নাম ‘যাদু বাছাধন ॥’

উপানন্দ নাম রাখে 'সুন্দর গোপাল।'  
 ব্রজবালক নাম রাখে 'ঠাকুর রাখাল।'  
 সুবল রাখিল নাম 'ঠাকুর কানাই।'  
 শ্রীদাম রাখিল নাম 'রাখাল রাজা-ভাই।'  
 'ননী চোরা' নাম রাখে যতেক গোপিনী।  
 'কালো সোনা' নাম রাখে রাধা বিনোদিনী।।  
 চন্দ্রাবলী নাম রাখে 'মোহন-বংশীধারী।'  
 কুন্ডা রাখিল নাম 'পতিত পাবন হরি।।'  
 'অনন্ত' রাখিল নাম অন্ত না পাইয়া।  
 'কৃষ্ণ' নাম রাখে গর্গ ধ্যানেতে জানিয়া।।  
 কণ্ঠমুনি রাখে নাম 'দেব চক্রপানি'।  
 'বনমালী' নাম রাখে বনের হরিণী।।  
 গজরাজ নাম রাখে 'শ্রী মধুসূদন'।  
 অজামিল নাম রাখে 'দেব নারায়ণ'।।  
 পুরন্দর নাম রাখে 'দেব শ্রী গোবিন্দ।'  
 দ্রৌপদী রাখিল নাম 'দেব দীনবন্ধু।।'  
 সুদামা রাখিল নাম 'দারিদ্র্য ভঞ্জন।'  
 ব্রজবাসী নাম রাখে 'ব্রজের জীবন।।'  
 'দর্পহারী' নাম রাখে অর্জুন সুধীর।  
 'পশুপতি' নাম রাখে গরুড় মহাবীর।।  
 যুধিষ্ঠির রাখে নাম 'দেব যদুবর।'  
 বিদুর রাখিল নাম 'কাস্তালের ঠাকুর।।'  
 বাসুকি রাখিল নাম 'দেব সৃষ্টি স্থিতি।'  
 ধ্রুবলোক নাম রাখে 'ধ্রুবের সারথি।।'  
 নারদ রাখিল নাম 'ভক্ত প্রাণধন।'  
 ভীষ্ম দেব নাম রাখে 'লক্ষ্মীনারায়ণ।।'  
 সত্য ভামা নাম রাখে 'সত্যের সারথি।'  
 জাম্ববতী নাম রাখে 'দেব যোদ্ধাপতি।।'  
 বিশ্বামিত্র নাম রাখে 'সংসারের সার।'  
 অহল্যা রাখিল নাম 'পাষণ উদ্ধার।।'  
 ভৃগুমুনি নাম রাখে 'জগতের হরি।'  
 পঞ্চমুখে 'রাম' নাম গান ত্রিপুরারি।।



কুঞ্জ কেশী নাম রাখে 'বলি সদাচারী'।  
 প্রহ্লাদ রাখিল নাম 'নৃসিংহ মুরারি'।  
 দৈত্যারি দ্বারকানাথ দারিদ্র ভঞ্জন।  
 দয়াময় দ্রৌপদীর লজ্জা নিবারণ॥  
 স্বরূপে তোমার হয় গোলোকেতে স্থিতি।  
 বৈকুণ্ঠে বৈকুণ্ঠনাথ কমলার পতি॥  
 বাসুদেব প্রদ্যুম্নাদি চতুর্ভূহ সহ।  
 মহৈশ্বর্য্য পূর্ণ হয়ে বিহার করহ॥  
 অনিরুদ্ধ, সঙ্কর্ষণ নৃসিংহ, বামন,  
 মৎস্য-কূর্ম্ম-বরাহাদি অবতারগণ॥  
 ক্ষীরোদকশায়ী হরি গর্ভোদ বিহারী।  
 কারণ সাগরে শক্তি মায়াতে সঞ্চারী॥  
 বৃন্দাবনে কর লীলা ধরি গোপবেশ।  
 সে লীলার অন্ত প্রভু নাহি পায় 'শেষ'॥  
 পূতনা বিনাশকারী শকট ভঞ্জন।  
 তৃণাবর্ত-বক-কেশি ধেনুক-মর্দন॥  
 অঘারি গোবৎসহারী ব্রহ্মার মোহন।  
 গিরি গোবর্দ্ধন ধারী অর্জুন ভঞ্জন॥  
 কালীয় দমনকারী যমুনা বিহারী।  
 গোপীকুল বস্ত্রহারী শ্রী রাসবিহারী॥  
 ইন্দ্র দর্পনাশকারী কুন্ডা মনোহারী।  
 চানুর কংসাদিনাশী অক্রুর নিস্তারী॥  
 নবীন নীরদ কান্তি শিশু গোপবেশ।  
 শিখি পুচ্ছ বিভূষিত ব্রহ্ম পরমেশ॥  
 পীতাম্বর বেনুধর শ্রীবৎস লাঞ্জন।  
 গোপ গোপী পরিবৃত কমল নয়ন॥  
 বৃন্দাবন বনচারী মদন মোহন।  
 মথুরা মণ্ডলচারী শ্রীযদু নন্দন॥  
 সভ্যভামা — প্রাণপতি রুক্মিণী রমন।  
 প্রদ্যুম্ন জনক শিশুপালাদি দমন॥  
 উদ্ধবের গতিদাতা দ্বারকার পতি।  
 ত্রিভুবন পরিত্রাতা অখিলের গতি॥

শাস্ত্র দত্ত বক্রনাশী মহিষী বিলাসী ।  
 সাধুজন ত্রাণকর্তা ভূভার বিনাশী ॥  
 পাণ্ডবের সখা কৃষ্ণ বিদুরের প্রভু ।  
 ভীষ্মের উপাস্যদেব ভুবনের বিভু ॥  
 দেবের আরাধ্য দেব মুনিজন গতি ।  
 যোগিধোয় - পাদপদ্ম রাধিকার পতি ॥  
 রসময় রসিক নাগর অনুপাম ।  
 নিকুঞ্জ বিহারী হরি নবঘনশ্যাম ॥  
 শালগ্রাম দামোদর শ্রীপতি শ্রীধর ।  
 তারক-ব্রহ্ম সনাতন পরম ঈশ্বর ॥  
 কল্পতরু কমল লোচন হৃষীকেশ ।  
 পতিত পাবন গুরু জ্ঞান উপদেশ ॥  
 চিন্তামনি চতুর্ভুজ দেব চক্রপাণি ।  
 দীনবন্ধু দেবকীনন্দন যদুমনি ॥  
 অনন্ত কৃষ্ণের নাম অনন্ত মহিমা ।  
 নারদাদি ব্যাসদেব দিতে নারে সীমা ॥  
 নাম ভজ নাম চিন্তা নাম কর সার ।  
 অনন্ত কৃষ্ণের নাম মহিমা অপার ॥  
 শতভার সুবর্ণ গো-কোটি কন্যা দান ।  
 তথাপি না হয় কৃষ্ণ নামের সমান ॥  
 যেই নাম সেই কৃষ্ণ ভজ নিষ্ঠা করি ।  
 নামের সহিত আছেন আপনি শ্রীহরি ॥  
 শুন শুন ওরে ভাই নাম সংকীর্তন ।  
 যে নাম শ্রবনে হয় পাপ বিমোচন ॥  
 কৃষ্ণ নাম ভজ জীব আর সব মিছে ।  
 পলাইতে পথ নাই যম আছে পিছে ॥  
 কৃষ্ণনাম হরিনাম বড়ই মধুর ।  
 যেই জন কৃষ্ণ ভজে সেই সে চতুর ॥  
 ব্রহ্মা-আদি দেব যাঁরে ধ্যানে নাহি পায় ।  
 সে-হরি বঞ্চিত হ'লে কি হবে উপায় ॥  
 হিরণ্যকশিপুর উদর বিদারণ ।  
 প্রহ্লাদে করিলা রক্ষা দেবনারায়ণ ॥



কলিরে ছলিতে প্রভু হইলা বামন ।

দ্রৌপদীর লজ্জা হরি কৈলা নিবারণ ॥

অষ্টোত্তর শতনাম যে করে পঠন ।

অনার্যাসে পায় রাখাক্ষের চরণ ॥

ভক্ত বাঞ্ছা পূর্ণ করে নন্দের নন্দন ।

বথুরায় কংসধ্বংস লঙ্কায় রাবণ ॥

বকসুর বধ আদি কালীয় দমন ।

বিজয়হরি দাস কহে নাম সংকীৰ্ত্তন ॥

ইতি — শ্রীশ্রী কৃষ্ণের অষ্টোত্তর শতনাম সমাপ্ত ।